

摘藻堂四庫全書薈要

集部

欽定四庫全書蒼要卷一萬六千二百十二集部

秋澗集卷五十六

元 王惲 撰

碑

大元朝列大夫秘書監丞汴梁申氏先德碑銘

并序

大德改號歲之六月越二日癸巳秘書監丞申君敬先
詣太史王某再拜而請曰惟申氏遠有世緒逮我先人
學紹醫傳心存道濟惠及一方雖遭罹世故譜牒墜逸

然自高曾而下班班可考而墓隧無銘神道闕表予小子大懼先德日遠恐泯昧將無以見於後今粗有纂述俾昭示子孫以傳不朽者敢請筆於下執事予以不敏辭者再請益堅乃為論次之謹按申氏世居汴梁曾祖諱天祿宋徽宗朝以嬰兒科供奉內庭門以金斗為識當時稱揚醫藝精全者有金斗申氏之目宣和末避地家秦州社樹坪祖諱良輔早以方伎知名西土祖妣馮俱壽終葬天水郡顯考府君諱仲康字西叔資稟寬裕

有長者風弱冠值金季流居陝號間天兵下河南愛申
裕間風土行沃定謀卜築以甲寅歲東徙今遂為南陽
人府君世其業禁方秘訣夙承指授復為該洽軒岐以
來其書奧妙悉精究其理學既博伎益工在醜不矜其
能活人不期其報過客病困逆旅及貧無資者家置病
寮躬進湯劑糜粥既平復量給路費以遣之遠邇注瞻
以材德兼稱如南陽富民孟氏夫婦府君以伎能起其
死約兼金乘為謝後恬然不為禮或者不平對府君詬

之曰醫以濟物為任若貪圖貨利為心豈天生俞跗保
全天闕安羸劣之意哉子無復言客嘆服而退初府君
東徙聞盧氏守將堯里公賢而下士往依焉草昧除舉
族賴保翼一夕宋寇奄至執堯里而去以不屈遇害熊
耳嶺府君聞之糾合義勇者數十輩匍匐奔赴求得其
屍葬祭迄成禮兵後內外宗姻散失者衆求訪不少置
得媿之夫樵翁於申女叔於穰下既孤且寡收養終其
身平生行義類此甚夥今特書其顯著者識者謂府君

為善不近於名尚義不謀其利躬弗受社後世其興乎

以至元己巳歲季夏十有八日考終牖下享年六十有

七配宋氏系出京兆大家資端重未嘗露嘻笑年既筭

歸於我侍舅姑以孝敬聞鞠育諸子極於勤苦後八年

以疾棄養壽七十一祔葬南陽縣東泓河之右薛家里

子男六人曰政嘗監郡酒稅曰整河渠使曰敬即敬先

曰教早世曰敏江陵路醫藉提舉敬先性資醇裕醫學

明敏切脈審用藥精至元六年選充太醫世祖皇帝巡

幸兩都北狩東征典司藥石皆侍其行嘗於御前修製湯劑品藻藥性敷奏有條理上顧而喜曰汝身雖小口甚辨博又勅治元妃疾獲良愈蒙賜玉鞶帶白金有差至元廿七年由御藥院使陞授朝列大夫選丞祕省旌宿勞而從公論也自昔銓衡經制以方伎進者雖有殊勤不轉文武正班敬先讀書勵行有士君子之操故膺是除由是知揚厯清要光顯於親者越茲伊肇敢以府君之積善起宗敬先之肯構肯荷者而銘之銘曰

醫師之良本天恒德挾藝時行心貴專一其視患者罔
有莫適一盡我誠庸表怵惕顯允申公秉茲良直四世
三朝職司疢疾神砭易形靈丸起廢藥惠一方心深道
劑羸劣獲安炯我風義活人活國是乃仁術陰積孔多
陽報斯必篤生六子季實良器大我醫門學稱善繼藥
籠流光馨融帝室六脈和平聖躬福謚三十年間祇勤
厥職維皇念功寵數優特筵名仙瀛圖書東壁紆紫腰
金揚休山立匪汝是私良用勸激蒼烟故里光賁丘石

刻我銘章有煌申國獨山鬱茂白波蕩滴山川鴻濛慶
鍾來息子孫振振垂裕罔極

大元故奉議大夫中書兵部郎中韓君墓碑銘

并序

亡友奉議韓君之子冲既禫來謁心焉愴慕有慘而未
安者乃出所狀父行曰孤不天先人早世平時所期者
遠大挾其所有以前而車傾半道今其遂已矣惟是發
越潛德使表見於後庶存歿少有攸慰公與家府交敬

而知為詳敢百拜以墓碑為請予以義以分有不能辭者遂追叙而併銘之君諱天麟字伯昌姓韓氏世為漁陽上谷人父琇為人長厚儀觀秀偉少應武舉金季嘗以勞任慶陽府司錄判官母王氏誕昆季四人以次君為第三母以克肖故尤所鍾愛長業法家學即能鬻然見頭角於輩行間師以能稱之及為郡法曹獄無大小皆心極慮必盡彼辭情而後已時有楊叅軍者詐冒兵儲公易市戶事覺朝遣官來鞫逮捕者數百家弊積有

年不易措手知君幹蠱摘之倚辨楊既窘蹙無可得主者悉取償糴家價從時重君曰不可盜糧者已有主名百姓初不預知今從坐配償已是虛負取價合准出倉時估不然將有破產不勝其弊者上官從之衆得以輕脫至元二年辟充懷益路從事四年勾補中書左三部令史八年由考功轉御史臺有訴民自關陝來未經有司者議不受君執之曰民豈不知此顧憲臺為重因而拒之將無所控告罪彼越薦理其寃抑可也事多解釋

以能遷吏禮部員外郎遂建言隨朝掾史已有出職定
例外路吏資亦當與議使至公均被准其事行焉未幾
遷奉訓大夫出為瑞州路別駕俄超授奉議大夫常德
路宣課都提舉先是亡宋稅場濫收竒零等課名類甚
多君稔其擾曰生財有源初不在此使到官者權之有
法所獲多矣於是六色正額外一切蠲去常人稱悅及
比附上額羨果倍蓰時方憂官徵民負租追呼鞭扑急
於星火君就府僚與議曰今新陳未接人餬口不給兼

積久數多非一朝可辦急則必倍息取貸或易及男女
若爾是富益巨室怨歸公家非特於征商有所惜也稍
俟秋成征之未晚用是以停征八番大軍道鼎民被騷
甚且沮恢辨有司噤不敢誰何君詣行闡陳說主將喜
為約束之市肆賴以帖其乘機應變輸誠濟物多類此
政籍甚而課最省臺交章薦入授奉議大夫中書兵部
郎中尋被檄檢覈河漕回次濬之劉家渡以暴疾卒實
二十二年乙酉歲八月七日也享年五十有九以是年

十一月壬午葬郡西南親仁鄉康公里家塋慶陽府君墓右從溝闕也君氣志明辨有幹局善當官好持論往往出人意外表其起身立事不資藉昆弟恥踵跡人後氣之所充力取必至卓然自見於用者蓋天性然初韓氏北故后居衛生事微父俾之經商辭焉曰從政固所願也及顯達分有所資悉推讓不一毫取鄉黨義之又排難解紛樂與人為善教子讀書惟恐其不至配孺人梁氏元帥瑀之長女生子二人曰沖從事郎太平路經歷

日中御史臺令史繼志治家大克播構日燕曰梅童皆庶出四女已適名族者二二未并銘曰

維天生材畀世作程吏以事主尤資者能理具氣先浩氣迺形倬彼韓卿氣志蠶閔揚厯臺閣外彪中弼初轉相府樂夫有行庶覃厥心豈惟祥刑彼良而倂是大僂辱千里求哀情其可惜人以法辭我為理出不以其嫌竟直彼屈天秩有庸曾問內外由我一言至公無私財生多源取自有體筭及屢策徒擾而已以正以公所獲多矣猗嗟韓卿

用固強矯年不志充宜若可悼我思古人云誰畫了圖
維不朽君亦少慰子孝而賢仕涂方軌振厲光揚儘齊
厥美尚餘幽光樹石表隧揭我銘詩永勗來裔

平陽程氏先塋碑銘

南陽府倅程君瑞不肖里閭都司趙公倩也故與定交
最早知行已頗詳為人忼朗誠直勁挺尚義而遇事開
談洞見肺腑伸吾志而已而利而害初不計卹由是振
觸物論與時齟齬然識者以跡弛不羈許之與君契濶

者餘二十載大德改號之春自武定終更來京師僕方
忝長翰林尊酒叙舊英邁之氣猶夙昔也既而來請曰
瑞始以孤童子入侍隸實爾寧太子帳下逮事定宗憲
宗時朝廷遠駐朔漠屢奉命使襄漢間為互市官歲已
未扈世祖皇帝飛渡鄂渚戮力與宋兵戰有功蒙賜銀
幣有差及上登極選備膳夫車駕巡幸兩都征伐宴犒
割烹供辦蓋三十年於茲中間以軍國係重越分肆直
忤犯權倖致縲紲瀕於不測者屢矣以辭氣侃侃事竟

實無他幸不死朝貴多其挺志弗撓奏授忠顯校尉尚
食局使又七易寒暑積前後勞官武畧將軍出知奉聖
州今調同知南陽府事自惟愚忠朴直餘將無有供奉
闕庭寵膺民社秩中通忠竭誠圖報之念日深一日奈
桑榆景迫年與時馳而追遠返本之懷朝夕是切相嘗
僑居即是將起新阡奉安考妣神靈又念登仕版家先
世塋域例有碑誌况以東西南北之人表識之建尤為
切務俾子孫繼嗣拜掃考其世系鄉里遙追來孝免夫

有旌紀寂寥之嘆尚吾友惠顧賜之銘則程氏為不朽矣某以契舊且素賞其方概廼為書程氏之先代世為平陽洪洞縣李村農家曾祖大父俱逸名諱所可知者曾祖生子四人祖第三子也金末以勞効嘗攝行本縣令有子玉房行第八暨第九郎其肩裔尚守遺業玉即瑞之父也府君慷慨重然諾風義矯矯有無與衆共之貞祐兵亂以武幹保完墟落國朝壬午歲迎降太祖皇帝從攻鳳翔用愼敵功總西京工匠年三十有九以疾

卒夫人曹氏出扶風宦族生子五人曰實曰瑞即武畧
君曰西京曰當僧曰午兒實之子和羅職庖人氏次日
巴魯武畧之子曰靈童新阡之兆建於彰德府湯陰縣
之北蘭里實大德戊戌歲某月日也仍為發先世之潛
德懿行與武畧之挺志顯親者為之銘俾光賁新隴昭
示來者云其辭曰

維農秉志篤於儉勤服田力穡鍾氣之醇積厚種邁嘉
祥自甄何以為驗慶流子孫猗歟程氏植本浚源藹藹

風義超越同倫由農而士奮起艱屯克昌再世攀附鳳
麟愚忠朴直祇奉嚴宸典司玉食三十餘春名喧禁籞
僉曰蓋臣付之名社賞其勞勲貳車五馬早蓋朱輪大
侈寵數顯揚其親有鬱者阡羨里北原光融松檟銘勒
貞珉何以訓之孝義忠純昭示不忘垂裕後昆

大元故清和妙道廣化真人玄門掌教大宗師

尹公道行碑銘

并序

道之大原出於自然而隆而污繫夫世運顧人力有不

能致者如甘河之異見於西秦崑崙之氣表於東海自
非素鍾仙分價重一時疇克輔承者哉金貞元正隆間
重陽王尊師始倡全真教法建長春丘公應期濟度道
乃大行風聲洋溢丕冒海隅至於靜涵道幾動周妙用
驂鶴馭之孤標謁龍庭於萬里絕塵而下稱繼述之善
者我清和尹公其人也師諱志平字太和系橫海華胄
大父而上世以儒業擢進士第歷郡守者凡七人因宦
遊東萊遂占籍焉祖公直父行誼皆融德不耀樂施與

鄉黨以善人稱師生金大定己丑初母氏夢羽儀擁導
若仙官迎謁者寤而生師有瑞光盈庭之異既長資穎
悟不凡杳然泰定了知生前事讀書日記千言及冠行
遇道士自關右來約師同詣文登醮祭歛失所在但見
羽流乘白龜化現空際師懍恍感遇信道愈篤既而潛
訪長生師於洛京父母數追止之至鎖閉靜室無幾遁
去寓昌邑之西菴道家者流以禁睡眠謂之消陰魔嘗
坐樹蔭下一夕假寐間見長生師厲聲曰向祖師來化

汝尚未悟耶遂揮刃斷其首剖其腹滌易鄙俗去其自
滿由是胸臆洞然靡有所惑二親知志巨奪始聽入道
明昌辛亥參長春公於棲霞遂執弟子禮久之偉其有
受道資盡以玄妙付之曰吾性靈明如鑑不受垢常切
瑩拭以湛吾天自是日有所得又問易原於太古傳錄
法於玉陽鍊習內銷聲光外白遠近尊禮戶外之屨滿
矣濰陽州將完顏龍虎素慕真風奉亭圃為菴尋賜額
曰玉清觀師佩上清大洞符籙主盟齊東者廿寒暑長

春聞之喜曰吾宗教托付今見人矣大元己卯歲太祖
聖武皇帝遣便宜劉仲祿起長春於寧海之崑崙山聞
師為其上足假道於濰以見之遂同宣詔旨先是金宋
交聘公堅卧不起至是師請曰道其將行開化度人今
其時矣長春為肯首決意北覲選道行純備者十有八
人從行師為之冠致帝眷日隆渥玄風遠倡師羽翼弱
成之功為多歲癸未長春還燕主太極宮師雅志閒適
退居縉雲秋陽觀俄徙德興之龍陽長春仙去命公嗣

主玄教即建處順堂於白雲觀奉藏丘公仙蜕壬申四月太宗鑿輅南還師迎謁於保賜坐論道慰諭者久之翊日后妃臨幸祝香琳宇錫道經一藏自是四方學者輻輳堂下歸依叅叩于于而來惟恐其後師摘要訣誨之日修行之害食睡色三欲為重多食即多睡睡多情欲所由生人莫不知鮮能行之者必欲制之先減睡欲日就月將則清明在躬昏濁之氣自將不生向上達者率自此出人徒知從心為快不悟制得此心有無窮真

樂也癸巳冬十月講道經上下篇於義州通仙觀微辭
與義大有發明及演七真造道根源殊洒然也聞者為
洗心醫巫問為燕遼鎮山深秀雄鬱必有弘演博大真
人往來其間甲午春師往遊焉先是瑞氣葱鬱封鎖不
散者決旬至是開霽衆以為山靈開先之兆師謝曰吾
何德以當之終南祖師煉化地號活死人墓者蕪沒日
久仙樞浮殞朝夕念茲若熒熒在疚乙未春闕輔畧定
師西遊併圖營建又興復佑德雲臺二觀太平宗聖太

一華清四宮以翼祖觀初道出汾晉沁長杜德康請設
醮錄方章啓玄鶴翔空仙侶散壇時雨濟旱丙申秋奉
旨試經雲中度千人為道士俾祈天永命禔福元元師
德望既隆所至風動雲委吏民瞻拜至克悍無賴輩皆
感化弭伏戍戍師壽七秩以教門事付真常李公庚子
秋葬祖師於白雲堂會送者數萬人時久旱雨雪盈尺
咸謂孝誠所致繼董祖菴偃功尋敕額曰十方大重陽
萬壽宮初大定七年祖師火其菴東遊或惜之曰修人

在後吾何亟焉至是殿閣廊廡覆壓千柱終始六甲脗
合祖意識有數存乎秋九月歸五岳舊隱己酉賜號清
和演道至德真人金冠錦帔付焉辛亥春二月十有一
日沐浴易衣冠書頌曰觀化八十三歲澹泊全真活計
臨行踏破虛空開放光明無際落筆而逝馨芬滿室三
日不散臨死生際其明了如是師既逝化以皓駒輿櫬
寧神五華其日終南祖觀有一道士乘白馬來告清和
去世竟不知所之後訃音至考驗月日知為神遊化現

吁亦異哉師儀觀秀偉風度凝重如瑞人神士不可梯
接然即之春風和氣津津溢眉宇間樂傾所得誨誘不
倦志專利物感應無方如在濰陽松栢不種自生其寓
仙谷叢竹一符卦數學徒徧四方觀宇滿天下德博道
尊過化存神之妙不能具載皆出於至誠感發無一毫
詐偽之私宜乎傳嗣道統配列師真上繼長春下授真
常前後無媿可謂清而不耀和不流克肖克荷玄之
又玄者矣師平昔所在求詩頌教戒者無虛日肆筆應

答辭理可觀有葆光集北遊錄傳於世中統建元誠明
張公表師行業於朝追謚清和妙道廣化真人制辭有
性天開朗心地坦夷接重陽道統之傳為長春門人之冠
宜錫褒章永光仙籍之旨始終昭顯矣法孫陳德定出
延安士族師事真人門弟子重陽知宮仇志隆以修進
餘力祭醮符籙皆道習之居終南四十餘年潔以修己
耕而後食處品穴間妖魔屢梗德定以正法神力悉驅
除之由是名著秦雍至元廿七年耀州少尹姚某以聞

蒙世宗文武皇帝召至闕下試驗有徵寵膺玉璽貂衣
之賚元貞二年賜號棲玄致道通真法師三年宣授秦
蜀道教提點踵門來請曰德定自惟托跡草茅何以致
此蓋遠藉先蔭思効光揚師祖清和公之返真侍郎趙
楠已表松臺祖菴之復實所權輿今紀行之碑未克昭
建是殆闕如提點溫某等五人已礮樂石幸翰長先生
惠之銘是亦不一書而止之意也予曰有是哉探源報
本乃吾儒美事道雖不同其理弗異次其所具而重之

以銘其辭曰

天之蒼蒼一氣清其視下也猶杳冥真元有道本強名
俾而全之須人弘甘河感遇世已驚風聲波動東海溟
七葉泛灑金蓮英至人挺出開世程崑崙山高古蓬瀛
長春再傳何德馨鶴馭九萬搏雲鵬雷雨之動方滿盈
為民請命以道寧維持綱紀誰使令十八大弟先啓行
丘仙一笑溘上征清和進修純粹精傳授道統力主盟
潔已應物謙而誠拱璧駟馬非夸矜事惟無心物取衡

尹家樓觀青雲程開天演化玄元經全之為教乃天明
縱說監說鍊此形方寸莫遣三害櫻陰魔大嚼風掩燈
嗜慾一肆甚五兵顛木之枿不少萌昏濁之氣何由生
志惟不分神乃凝大賢大哲皆此成用之國治如鮮烹
重陽祖菴功勃興終南太華高稜層玄風浩浩海宇傾
竹宮醮記儲祥禎雨暘下遂萬物情錫民五福世道平
穰穰復正德性寧一朝倚蘭升紫庭仙階霞帔光晶晶
物緣太盛神或憎進退合正聖所稱谷神不死存至靈

未妨委蛻仙山垞瓊樓石室戶不扃神遊八表風泠泠
道傳千古垂日星門人攀慕涕泗零令威留語會有徵
茲惟華表歸來銘

衛州創建紫極宮碑銘

維衛紫極道宮全真師沖虛子房公所創建也初公既
叅丘尊師於海上長春日其氣志非凡殊稱異之居無
幾何命公主馬坊之清真觀迨國朝壬寅歲聊攝趙侯
請師住持郡之玄都宮於是鶴馭東遊道出敝邑汲長

趙實扈林聞師道價重一時以治城崇道里隙地廣六十舉武縱則倍之奉師為玄覽別館訢然許焉輟其徒張志洞等結茆以居常闕地得石上刻宋太宰張邦昌詩什知為吳越錢氏子孫棣華庵故基也師留博僅紀而西還淇上方履滿戶外每以居逸教无為慮因集其徒而告之曰吾大方家雖清虛自然為宗要以應時衍化為重詎容山林長往歸潔一已乎且吾行天下多矣未若衛之土中而處會俗美而易化不於焉闡吾教尚

何往然祝延寶供香火焚修之所非大壯麗不足以張
皇教基竦道俗瞻敬之心也乃命門徒孟志玄趙志朴
率衆下商洛之材跋涉艱阻以歲月得木萬計遂建宮
殿七巨楹內設三清大像示至道之原也中起通明觀
以奉玉皇黼宸欽天帝之尊也後復作七真殿五筵叙
列仙品見玄教之傳也下至壇墀神闈齋室庖湑廡庫
蔬圃莫不畢舉師素負巧思志堅而氣充規撫位置意
匠中定不待畫宮於堵而為執用者之法要使堅完鞏

固為數百年物尋師委蛻仙去遺命志朴等曰今大功
將集無以我存歿而作有間勉強前修以卒吾志故志
朴等三十年間焦心勞思攻苦食澹繼述師訓猶一日
然今則繪彩供帳截然一新金光五雲絢爛溢目宏麗
靖深為一方偉觀其工費之廣自力其力初不外假而
衆忘勞焉實經始於壬子之春迨至元甲申秋工告迄
功志朴乃件右師之行業與夫興造本末踵門磬折謁
予文者再余以鄉梓盛蹟且與師有玄談之雅勉為叙

次之師諱志起濰州昌邑人幼業儒既有異夢有覺
遂入道為人氣貌魁竒操行清峻遁古今善篆籀樂與
名士夫遊至於醮祭之獲福雲鶴之顯異所在驚動世
之耳目者為多遺山謂師外朴而內敏質直而尚義似
夫墨名而儒實者蓋確論云宜其事業成就如此至元
戊寅志朴以師德請於朝蒙敕定仙號曰弘直體靜真
人若志朴者於師弟子之禮始終盡矣尚猶以師不覩
道緣大成為敬予慰之曰不然昔真人舍清真而遊博

去博而終稅駕於衛今雖神遊無方其眷戀於此也必
矣况共衛間名山勝境固為小有洞天如玄元化現於
仙山公和舒嘯於蘇門海蟾留題於白鶴仙蹤靈貺前
後接踵見於方志雜出於傳記之說者昭昭矣異時馭
風騎氣追陪真仙安知不過故山而留語俯華表而增
懷而為孫劉絕塵之舉也耶仍作歌詩詳見師志俾刻
諸樂石雖綿亘千祀庶幾來者有所考焉其辭曰
道家者流本靜清杳冥而無迹與形宙慈尚儉貴不爭

茲乃黃老之常經有時土苴為世程祈禳醮祭由是生
像緣教設雖強名雄樓傑觀爭崢嶸猗嗟先生起營陵
魁偉德業玄門英至人未免安素行河山兩戒盤金庭
方花古礎排巨楹紫雲為蓋青雲城群仙婉統湏皇靈
紫垣落落羅天星先生演化意有徵後孰倦焉先此營
庶幾張本道可興陰助政治歌清寧大緣未竟歟上昇
門人攀慕涕雨零歲累月積大有成昔不久視為宗盟
仙宮洞房本不扃神遊八表風泠泠來過故國宜少停


紫極夜氣開蓬瀛追攀逸駕非吾能尚想為國儲休徵
風時雨若穀不螟下洗澆俗還淳誠我詩刻石何千齡
要作華表歸來銘

秋澗集卷五十六

謹按卷五十五第十頁前三行張律舊作張驢今改 前
四行巴克什舊作八十又邁珠舊作買住今並改後做
此 十一頁前四行安珠舊作安住又海桑托噶舊作
海山鐵哥今並改 十六頁後七行鈕祜祿舊作粘合
今改後做此

卷五十六第八頁後三行實爾寧舊作昔刺你今改 十
頁前二行和羅舊作懷驢今改 前三行巴魯舊作伴
驢今改





總校官進士 臣胡 榮

校對官學正 臣卜維吉

騰錄貢生 臣繆 濂

欽定四庫全書會要

集部

秋澗集卷五十七

八



臣董誥詳校
詳校官助教臣謝登雋

欽定四庫全書蒼要卷一萬六千二百十三

集部

秋澗集卷五十七

元 王惲 撰

碑

輝州重修玉虛觀碑



道士介煉師范君贄禮幣來謁拜而請曰敝觀在

蘇門顧惟狹陋然歷年久實為自昔名額敢託斯文俾
見興造本末暨師真住持所自用傳不朽迺宿昔所願
見幸憲使惠顧越為光有赫按所具事狀州西郭曰草

市城北走出廣新門百舉武有觀曰玉虛攷其肇基蓋始於前宋政和間所建大定初仍賜今額為正殿一旁小殿二中設三清四聖元辰等像函丈後列神閣前敞下至真官齋壇賓客庖庫之位咸叙而即宜承平久法供大行鐘磬齋魚之音隱然聞山水間蔚為共前儲祥勝地壬癸兵餘日就荒落厥後清虛弘道真人來主治之月殿星壇稍復於舊尋冷公西歸屬之通妙嚴君顯奉師訓惟恪乃創水磴稻田褚莊等業雖罄刮衣盂資

瞻徒侶大有方便丙申冬嚴既示化真人志慮弘深召
上足通真師梁志一謂曰玉虛道場藐爾於共今繕修
頗完資用苟有第道匪人弘何以行遠矧共山羣彥所
集半為方外眷屬微汝曷克洞玉清之虛靜承文獻之
顧接哉於是唯而來嗣飭治焚修其用充儼已有者守
之日固方來者增而歲新復於百泉西涯買田數畝築
致爽亭貯經史植松竹號嘉惠別館娛言一室罔間儒
墨暇則鼓琴詠歌將以挹蟾房之景氣接鸞鳳之遺音

豈惟與泉石而為伍也雪齋姚公愛其幽勝亦嘗徜徉
其間與師為蒼烟寂寞之友傳曰尚友知人梁之為道
概可見矣既而師倦勤盡以後事付高弟道燦燦為人
丰姿疏秀氣爽而象恭志繼而本立守護傳繼惟恐墜
越其徒稱之曰能燦姓張氏自童行入道今三十六年
矣嘗觀道家說有玉清玉虛等號亦猶天有九霄神霄
為最高然沖而用之於道體何在是固老子法虛心實
腹守為清修要者蓋心不虛則道無以入物無以容教

無以受而腹無以充矣坐進之功苟疏疑存之理或熄
若道燦者法壽方爾主治院門甚力至於接外務崇本
宗誠能中虛而應物以道腴而充腹者哉正自師祖師
梁庸玉汝於成之旨也若然則其為後來紀綱是者矜
而式之繼為不朽無窮之傳也必矣仍為門人作詩俾
歸來望思以極道真之本其辭曰

蒼蒼共巖桂連蹇兮杳焉予懷仙遊遠兮山空日寒悵
疊巘兮宮居粒食思展轉兮遐想仙標玉雪質兮彤車

載花紅一色兮醉鞭星馭金虬
蜿兮批糠塵世宅闌苑
兮嗟嗟堪與一烘爐兮往古來
今爍無餘兮世外無物
須人徒兮剗滌玄覽歸靜虛兮
服餌節飲差少瘡兮弱
志强骨壽吾軀兮庶幾真筌師
同符兮

大元國大都創建天慶寺碑銘

并序

大雄氏之為教如慈雲慧日覆燾無際
惟得其人道乃
大行宮居像設亦從而熾盛之我
國家鼎定全燕教
隆內典故精藍勝刹莊嚴寶界金碧
相望有佛國大

乘氣象惟永泰寺肇基自遼彌陀者泰之別號也大
安兵燼廢撤不存鞠為茂草者五十年矣大元至元
壬申有僧雪堂始來結菴而主之先是師業嗣法猶
窟潛天德以經戒嚴機鋒峻越在雲朔名動京師嘗
假息間有以天慶名所棲而告之者初不論其故既而
有駙馬高唐郡王聞師名德喜之既覲止即依慈蔭扣
真詮師順事闕方日有所覺以至承嗔獲譴非罪而罹
苦毒者因師一言多所縱釋其後王請師住豐之法藏

院仍贈貝錦法衣用著顯異尋以道行上聞有詔所
在護持及觀光大都郡王乃出重幣易是院為師待間
駐錫之所與其徒奉香火修潔精進而已至於建大道
場擴充無量功德蓋遵養而有俟也迨甲申冬皇孫
噶瑪拉以師持誦保釐故欲辟靜室處之官府辭不可
翼日出貨泉二千五百緡洎名驃二仍諭留守段禎詹
事丞張九思即所居庀徒蒞事起三大士正殿文室七
巨楹下至門閭庖湍賓客之所畧皆完美始於乙酉之

春成於丙戌秋仲役初作闕地得廢鐘所刻天慶二字
考之蓋有遼建號也事夢既協即為新寺名額於是倚
佛像於金光沸潮音於空際有來諸天普臨雙樹顧誕
永泰廢餘復為清涼法觀矣後三歲奉皇孫奩香禮江
浙各刹起造藏經師冒涉江湖往返萬里存仁過化高
風所及奔走供養且有金仙通靈伽藍主護之應吁亦
異哉凡得經四藏計二萬八千餘卷分貯大都之開泰
天慶汴洛之惠安法祥及永豐法藏院仍以法物付之

使人無南北通暢玄風壽聖皇贊寶緒天花雨紛梵唱
雷動日開八方之供者此師之所圖維也宜其經來神
衛號應基先雖老栢重榮神松回指有不是過者遂不
千里遠持待制王之綱事狀以寺碑來請曰山僧空疎
無足比數以義以契尚憲使與顧以銘章貺之始終之
願畢矣予以師喜儒學有器識所交皆藩籬大臣文武
豪士緩急於士大夫周旋不榮悴間解紛振乏要有實
效然去來其間殆雲凝而風休也嘗即寺雅集自鹿庵

左山二大老以下至野齊東林凡一十九人作為文字
道其不凡時方之廬阜蓮社云是亦將因儒釋僧之特
達者也宜其行業成就如此固可以著金石而垂不朽
矣師諱普仁字仲山姓張氏雪堂其道號也世為許昌
人父母榮官至豐州司錄參軍母夾谷氏師生有禎祥
甫毀亂不近葷酒初祝髮於壽峯湛老再具戒於竹林
雲和尚及叅永泰贊公一見器異即蒙印可至有機鋒
洒落瑩徹冰輪頭角崢嶸光騰星緯之喻贊派出臨濟

第而上之師乃慧昭十九代孫也過鎮陽樹碑表行濬源接派以昭其本於尊祖追遠光又赫焉余嘗論天下之事雖小大有殊醜酢注措皆有本末就釋氏教論之佛法者本也塔廟者末也崇其末而遺其末求進於道亦已難矣若師也可謂持用有方審所先後者哉乃隨喜贊嘆而作偈曰

道之大原出於天物生而靜乃本然扶持有術繫後傳惟聖日遠湮其言奪攘矯虔紛目前佛乘自西來竺乾

慈愍齊度心為先衆生迷惑不知覺沉溺苦海甘流連
人人安得以手濟以法為柁經為舩奉持頂戴破黑業
火宅變幻生青蓮龍宮紺殿儘瞻禮具香須滿黃金田
阿師振錫下南海豈為頭角爭昂昂向來四萬八千偈
重與震旦開經筵燕豐汴洛還舊貫佛界珠網搖秋烟
羣昏再曉歸至善如夢日月金沙淵漢人得經纔四十
未若此舉思無邊功圓行滿師不有歸之帝孫祈永年
八方奠枕磐石靖天子萬壽南山堅聖孫神子鹿不億

惟城惟藩復惟宣歸來丈室炷香坐但覺鐘鼓清而圓
從此婆羅雙樹底知師澄定草鞋禪

大都路瀋州隆禧觀碑銘

瀋州距今新都東南百里而近本漢泉州地遼為鎮而
亡金縣焉兵後井里蕭索僅存縣治原隰平行渾流芳
淀映帶左右建元以來春水澄融之際上每事羽獵歲
嘗駐蹕民庶覩羽旄之光臨樂遊豫之有賴故生聚市
闕旋踵成趣至十有三年遂升縣為州從吏民之請也

爰有道館據城西北維亦由是而修崇焉住持圓素大
師劉志實者許之長葛人夙秉淑質自童行入道師希
真劉志永永即長春丘公高弟清虛韓志谷一再傳也
初師永誅茆於都之東郊刻心坐忘凝塵空竈者十年
盤山王棲雲道價高一時歆其精修枉道造謁自號麻
衣老壽八十有四怡然而逝師之在弟子列也侍晨昏
服勤勞人所不堪已自若也積寒暑三紀猶一日然麻
衣見其持守不易皮毛盡而真實在可與有立於是

通真觀屬院曰玉晨菴者令主張是戊午間誠明真人
愛其地佳而氣腴囑之增建以應有開之先始焉荒廬
二十餘畝敞屋數間蔽風雨而已師乃以和光同塵朴
實感物為方至一鄉欽向願言信施有不期然而然者
助益既多功用漸集遂起三清殿繪玄聖於堵所謂上
九位者居其中又書日月星官歲德師聖岳瀆等神列
侍兩傍雲舒霞蔚光彩絢目殆玄像肇分端倪呈露下
至嚴裡有壇靜棲有室凡所需皆具以屋而計者三十

楹歲時清供真仙來臨鐘磬之音隱然空際誠迎祥之
別館一方之榮觀也既落成洞明宗師以今名榜之及
玄逸真人張公嗣教嘉師之勤命書石以昭厥後遂介
鍊師劉文甫來請銘予以謂肯心而構易故而新豈惟
瞻者增敬其因衆成功同延慶壽荅鴻休而畢師志使
來者祝嚴罔逸而隆福降簡穰之本是固所當書者仍
以黃庭七言體歌以系焉其辭曰

道家者流玄默稱抱持其雌無所矜居室火食相奉承

鳶飛戾天魚在泓疇不若爾休其生爰因象設心自兢
仍用善俗滋良萌鄴州維南泉故城玉晨有庵無所營
敞廬數間僅幪帟一旦締結三十楹烟光粼粼萬瓦青
正自肯構今有成要擴師授昭予誠為國迎祥禱上清
鑿輿歲幸實省耕延芳春水紛霓旌遊豫何翹歌三登
千秋萬歲樂事并道人北拜乞此銘隆禧因之播永馨
雲間歎賞間嘒聲安知不有成公興

大元故關西軍儲大使呂公神道碑銘

盡瘁以事上忠也守志以完節貞也忠貞之澤流潤後人俾功名奕葉富貴一時而親弗逮者天也故聖人垂光揚之典可以貫幽明而慰存沒斯亦孝之至義之盡也若夫負卓越之奇材抱騫勝之逸志起家侍從收功轉漕臺閣藉風雲之舊門庭眩組綬之榮始以故家遺俗終以令聞令望振門闕而紹先猷者吾於遂城呂氏見之矣呂氏世為燕陲鉅族值金季搶攘譜牒墜逸高曾而下淪不可昭穆公諱嗣慶字昌齡考諱祐仕皇元

由行尚書省掾充諸路人匠府總管妣李氏公幼喜讀書不從羣兒嬉既冠氣貌魁傑學通經史善騎射長於辭令思以竒節偉論表見於世恥齷齪出人後時朝廷遠控北樓詔龍門劉公元帥黃公攝行臺於燕柄用頗需決公策時務所急及便益民生者十數事以撼二公果竒其材識以國士許焉既而挈之北覲引見太宗皇帝薦其材應時需堪備供奉上偉其儀觀收隸御帳下碌碌初無所知名居無幾何譯語國體閑習通曉如素

宦於朝者由是稍得近侍上前公資穎悟應對周旋動
協睿思自爾顧遇頗異出入殿庭寒暑夙暮十載間謹
畏小心未嘗易常度上審其可用命提點尚食局事國
朝大事曰征伐曰蒐狩曰宴饗三者而已雖矢廟謨定
國論亦在於樽俎饜飫之際故典司玉食供億燕犒職
掌視前世為重凡羣臣預燕衍者冠珮服色例一體不
混肴號曰濟遜必經賜茲服者方獲預斯宴於以別臣
庶疏近之殊若古命服之制公前後被賜濟遜錦服十

餘襲寵數之隆於斯可見歲己未憲宗下詔伐宋車駕
由隴山道漢蜀趣合州之釣魚山大兵既興糧餉為大
計庭議推公宜膺將漕乃降璽書金符充關西興利軍
儲大使公轉致有方給授均一士無飢餒之色民寬飛
輓之勞竟用勤劬致疾以庚申年正月廿四日卒於京
兆府官舍得年四十有三歸葬隧武之西原從祖窳也
公資倜儻有大志奉上忠事親孝交友誠進不隱謀退
無私議古今成敗胷中皎然吻縱波濤屢中倫慮材優

器幹事無盤錯膂力方剛經營伊始謂利澤施於人功名昭於時可力致也一旦濟浩浩之長川中流柁折涉漫漫之遠路半道車傾士論於焉為之嘆惜夫人王氏系保定大家姿溫恭靖淑公歿之歲纔廿有八舅總匠府君尚在堂二子方髻齡挺志自誓仰事俯育亢起大宗為任遂嚴奉舅孀壽終八秩教育二子至於成人為長子澍娶金名臣追謚通憲先生梁公孫女今以才華英邁練達政務任樞幕經歷為次子淵娶漕僚清苑王

君仲女資秉幹敏棣萼輝映任承仕郎管勾中書承發
司昆季筮名朝籍校世宦故家不失舊物皆由夫人節
義有方以之扶持者也姻戚鄉閭至爰稱行美取為訓
範女一人適大都郝氏孫五人澍之子道安女惠鸞淵
之子定安季安賜安壽五十一終於大都私居之正寢
越三日祔安玄堂實至元八年十一月十六日也澍既
長樞幕秩中通貴一日與弟淵謀曰今粗有所立猥荷
析薪可不知其所自耶惟我先人大志不遂賚恨下泉

妣貞幹內事克隆遺緒潛德遺淑大懼墜佚有求銘太
史揭石神道賁松檟而垂示不朽融管彤而發越幽光
罔極之恩庶幾昭報迺以不腆之文來請某自惟昔任
裏行與澍婦翁孝可定交時澍方聯姻媿自是交義日
篤於今三紀以契以舊有不得辭者謹掇其義烈之言
振衰風而厲薄俗者銘之其辭曰

惟趙北際保為名城風聲氣習而燕與并越此兩間古
多豪英游談尚氣芥拾功名矯矯呂侯資秉忠貞濟以

學問又多藝能文武備具富之邦經囊雖脫穎已為世
驚一朝麟趾來儀紫庭入侍帷幄即允帝情錦衣分賚
寵數光榮佐商有道奚翅割烹大駕南征如雷如霆食
惟兵本以先啓行曰轉曰漕職焉汝勝民安飛輓師樂
均平心計鞭笞以經以營鵬圖海運九萬初程一債不
起其孰使令秦川慘澹有來英靈不隨朝露溘焉涕零
化及閨壺義烈蒸蒸二子承慶若綬彩纓婉婉幕畫執
樞之衡顯揚有例聖經義明郎峯西峙雞距東傾武隧

西原風水攸寧墓復從祖多祉是膺元身不歿永振家
聲古所謂不於其身而在於子孫者其言有徵何以驗
之視我刻銘

大元故昭勇大將軍北京路總管兼本路諸軍

鄂囉總管王公神道碑銘

國家當肇造之際所在豪傑應期效順畀世侯疊將鎮
據一方父死子繼兄沒弟及蹈故步而執成規固自若
也迨夫守成尚文登庸賢俊通遷調而革舊習明治道

而考殊功所謂閱子弟持崇高之體不學無術喋不能有所施為備員而尸祿者多矣論其籍父祖之緒餘卓爾以才傑著聞膺朝廷之選遴藹然稱為良牧伯者誰乎予於孤竹王公見之矣公諱遵字成之世家平州之遷安縣祖諱誥亡金貞祐初任興平軍節度幕官攝府事方大元經畧中夏皇太弟國王奉命出兵出榆關循盧龍塞而南雷砰電激所向無前府君審天命之眷臨憫生民之塗炭遂挈二州五縣版圖投獻轅門王嘉

其忠赤首倡大義即聞於太祖聖武皇帝蒙授榮祿大
夫興平路兵馬都總管知興平府事尋錫金虎符加左
副元師兼安撫使父諱德明字才卿早嗣世爵屬遼右
初定撫養遺黎職修藩翰光奕先業焉公幼穎悟好讀
書年未弱冠入侍藩邸即能練習國體通曉譯語及長
資沉毅負高氣所交皆一時豪傑立志宏達恥碌碌隨
人後歲戍申襲父職仍佩金虎符公自祇承先政夙夜
惴惴惟恐失墜視民事為難不敢忽易遇政令之不便

時俗之未安思而不置憂形於色必咨訪更張俾理順
事得而後已未嘗恣情耽於游宴二十年間猶一日然
咸謂臧孫有後於魯榮祿之澤未艾也辛亥歲入覲憲
宗授本路總管兼萬戶俾專兵民之政殊光寵也世祖
皇帝踐祚分朔南為十路肇建總管府以公奕世材賢
授平灤路總管換佩金虎符且有奉公恪志當副所委之
諭至元乙丑轉官制行授懷遠大將軍知中山府事三
年升昭勇大將軍彰德路總管六年改懷遠大將軍總

尹順德路九年復昭勇大將軍陞授大原路總管兼府
尹本路諸軍鄂囉總管十四年遷北京路總管兼大定
府尹以疾不赴廿一年上章致仕日與故交雅士用琴
書碁榭相娛樂序宿好暢幽情裕如也不幸於至元廿
五年正月廿有七日薨於私第之正寢享年六十有四
越七日葬於遷安縣東石橋西原祖塋之次夫人安氏
山東東西等路軍撫使安公之女和柔貞順光備婦道
今壽登期頤夫人高氏出盧龍處士家資賢明勤於內

助主持家務營辦公喪預有力焉子男五人曰國彥蔚
州採木提舉曰國傑俱先公沒曰國英不仕曰國士早
世曰居仁高所出忠翊校尉湯陰縣尹子女三人長適
宋氏次畢氏嚴氏男孫三人布哈永興闕公資雅重

智慮周密奉上忠接下有禮善養名馬識別鷹隼衣冠
修潔車從閑雅有承平豪貴風度人徒知氣習體貌頗
養如是而已不知其當官蒞政持法謹嚴聽斷明察以
公正自處凜然有不可犯之色務要紀綱立號令行其

治相尹并皆監司理所工匠羣不稱之所集公與辯曲
直折姦橫不絲髮貸同僚以相假藉示并容為言曰為
之在我者當如是因公道而致私憾吾不恤也雖時不
相能後竟以事直而心服焉所至興修廣學尊禮師儒
崇禮讓而抑豪強致差賦辦集民安俗阜然惻怛無華
不示表暴持守剛果終始如一故治績渾然不可指摘
有古良吏風當中統至元間聖天子勵精政事以成效
責中書一時宰輔皆極老成選咸謂素無選舉篤責之

漸惟師帥得人上澤可下宣下情可上達庶幾德化之
成太平有象矣故各路總尹慎擇其人至有虛曠歲月
不肯輕以畀受者公之擢拜適丁茲時故四歷名郡兩
增崇資皆出公論之所在卒以職稱聞此足以伸眉高
談有光故家含笑瞑目無愧先世矣公既葬之十載嗣
子居仁念潛德遺懿恐遂湮沒聞不肖久忝太史屢銘
當代名公貴人乃件右事狀請碑其神道向公移鎮洹
上不肖適退居淇右相衛之交相去不百里迨尹晉陽

亦判平水幕汾晉兩府南北相望故稔知其政績後以
迎迓事南來會遇於張少尹吳公館張與公為風雲故
契談其家世行已為詳是則今日論述已有開先之兆
矣敢勉為次第重之以辭銘曰

遼西惟漢右北平自昔用武地必爭榆關北控盧龍橫
夾右碣石山海局沉雄氣鬱貫斗精王公孕秀時之英
天兵南下轟雷霆羣情恟恟孰敢嬰惟先奮效忠與貞
玄黃於篚王師迎兩州千里不震驚寒谷陡覺春陽生

風雲儷景同翻騰載世柄總民與兵一朝繩武走嗣承
鷗鵬變化天東溟六合澄清朝日升修文偃武論治經
唐虞黜陟公幽明罷侯置守除內仍德讓凜凜望久凝
漢二千石任可勝政刑相時量重輕剗裁錯節需鋒稜
善良與護奸惡懲大綱既振道自弘興庠育材昭世程
吏畏民愛風化行歷典四郡稱循能趙張才氣恥近名
白頭一節匪變更庶幾無忝先業榮世期福壽方川增
勤勞致疾孰使令生存華屋丘山零嗣惟克肖孚孝誠

銀鈎翠琰勒我銘蔽芾用播甘棠聲遺黎伏讀為愴情
墮淚當與征南并

秋澗集卷五十七

欽定四庫全書薈要卷一萬六千二百十四集部

秋澗集卷五十八

元 王惲 撰

碑

渾源劉氏世德碑銘

并序

金源氏崛起海東當天會間方域甫定即設科取士急於得賢故文風振而人材輩出治具張而紀綱不紊有國雖餘百年典章文物至比隆唐宋之盛若夫篤志力學扶藝應選首破天荒魁冠多士父子昆季相繼擢第

為名士夫作良牧守文行端雅門第清峻為金朝第一
流者其惟渾源劉氏乎劉氏出彭城望族五季板蕩播
遷朔土遼末遠祖諱用者居弘州順聖縣之耀武關世
業耕稼生子翰贈承德郎配張氏追封彭城郡太君生
撫字仲謙即今監察御史鄰之高祖也始釋耒耜習進
士業當遼金革命擾攘際學未嘗一日廢天會二年肇
闢科場公以詞賦第一人中選惟遼以科舉為儒學極
致文體龐雜萎薈視晚唐五代尤為卑下公勵精種學

文辭卓然天成妙絕當世一掃假貸剽竊牽合補綴之
弊其後學者如益宗獻趙樞張景仁鄭子聃皆取法焉
金國一代詞學精切得人為盛由公有以振而起之也
釋褐右拾遺轉知大城陽曲懷仁三縣擢大理正遷平
陽府判官安東節度副使兩貳大理寺出刺石州累官
中大夫年六十三卒於位翰林學士張景仁碑其神道
公性淳厚毋我毋固待物誠好誘掖後進三為理官議
獄主恕不屈於權貴故多平反尤長於治民興利除害

若嗜慾然施設有條理簡便可持久所去見思圖形奉
事素愛渾源山水幽勝買田家焉晚號南山翁夫人渾
源雷氏北京轉運使思之女封彭城郡君生四子曰汲
曰渭曰滂早世曰濬汲字伯深穎悟絕人早傳家學與
弟渭同擢天德三年進士屢為州縣有聲累官朝散大
夫應奉翰林文字西京路轉運司都勾判官平生寡合
不羈慕郭林宗黃叔度之為人晚節倦於游宦放浪山
水間以遣興讀書為樂稱西嵒子述壽藏記叙其行已

甚悉卒年五十八鄆王府文學陳訥銘其墓有西崑集
行於世屏山李之純引其端娶曹氏追封彭城縣君一
子侃字稚川大定十年進士第積資奉直大夫豐王府
文學兼記室叅軍孫一提夔字和卿奉職出身善作詩
曾孫文祖渭字仲清少好學克紹箕裘既登第授承德
郎知秦州隴城寨事調隰州軍事判官終朝列大夫尚
嵐州刺史號朴軒老人一子价河水泊酒監曰濬廼鄰
之曾祖博學強記少有聲場屋間既而用廢入仕至安

遠大將軍饒陽令配張氏封彭城院君生四子似儼
侯似字推行宣武將軍真定府軍資庫使三子從善字
澤卿彰德府酒監從皋字平卿從契字禮卿武義將軍
克勝軍副都統孫五人曰郊武義將軍曰邳等俱早世
似字稚章孝敬友愛出於天性力學能文稱其家聲四
試於庭不偶用恩賜第授承仕郎華州教授再仕承直
郎主沂水縣簿娶王氏嗣彭城郡太君壽五十五終於
家遺文雄深簡古有迺祖風嘗訓子孫曰為士當先行

檢如絲之潔將立其身慎無點污汝佩吾言則無忝矣
故屏山李純甫表其窶曰善人劉公之墓其為士夫之
紀蓋可見矣一子從益字雲卿自髫齡時已有成人度
擢大安元年進士乙科調鄆陽丞長葛簿陳州防禦判
官皆有治績投機應變措畫出衆意表進提舉南京路
摧貨事丁沂水君憂起復拜監察御史君負材尚氣資
之以學欲使事業表表大見於此一旦職與志合所言
朝廷紀綱時政利病竟與宰臣辯論得失不屈去職閑

居淮陽與諸生講明伊洛學久之選令葉縣至則鋤強
剔蠹豪族惡黨禁不敢少肆請免逋租三萬石致流民
自歸者口數千大起孔子廟既樹教本集諸生肄習其
中風化大行考課為河南最未幾召入翰林為應奉不
踰月而卒得年四十又四雷御史淵誌其墓趙翰林秉
文勒銘神道皆稱其器識明敏剛直敢言學可以輔政
教材足以濟時艱費志以沒士論惜焉葉民至廟而祀
之孔子稱遺直遺愛者豈近是邪蓬門其自號也蓋取

南山翁誠子詩元自蓬蒿出門戶莫教門戶滿蒿蓬之
句有文集十卷粹而瞻通而不流類其為人丙子嚴氏
封彭城縣君子二祁郁祁字京叙少穎異為學能自刻
勵有竒童目弱冠舉進士廷試失意即閉戶讀書務窮
遠大涵瀹鍛淬一放意於古文間出古賦雜說數篇李
屏山趙閑閑揚吏部雷御史王濬南諸公見之曰異才
也皆倒屣出迎交口騰譽之及與御史公退居於陳相
與講明六經直探聖賢心學惟於躬行踐履自是振落

英華收其真實文章義論粹然一出於正士論咸謂得
斯文命脈之傳壬辰北還鄉里躬耕自給築室榜曰歸
潛歲戊戌詔試儒人先生就試魁西京選山西東路考
試官後征南行臺鈕祜祿公聞其名邀至相下待以賓友
七年而沒享年四十有八翰林學士王磐誌其墓娶史
氏洛陽名族一女適前監察田芝子文冕一男景山終
國史院編修官孫一興同有神川遁士集二十二卷處
言四十三篇歸潛志三卷行於世郁字文季亦名士中

統元年肇建中省辟左右司都事出尹新河召拜監察御史能文辭工詩翰別號歸愚卒年六十一娶趙氏前禮部尚書璜之女一子景嵩鄴字伯震一子景巒儷字稚昂鄴之祖也登承安二年進士第累官至中奉大夫秘書少監壬辰北渡痛宗國云亡蹈河而死配李氏封彭城郡夫人三子從禹字虞卿登至大七年辭賦第官至朝散大夫同州祿判一子曰都從愷字舜卿自幼卓學不羣稍長入鄉校擅能賦聲再舉不屑就廕補官授

武義將軍登封主簿已而綜覈縣務束濕吏漕人不敢以少年書生易之國初生聚稍集遴選賢能亟於撫字辟府君攝領韶州事繼真授宜陽令縣當兵後庶事草勑高下隨心下車庶知其利病休戚斟酌而更易之凡科取差徭必驗其等第俾均輸焉暇則集俊秀於縣庠講明禮義美善風俗為政才期月而頌聲四達終更授河南府路經歷素精吏事規畫恢恢刃游餘地致六房無滯務公餘與紫陽楊丈西庵楊公九山李子徵薛庸

齊微之觴詠於泉石間中統四年正月廿八日以疾卒於私居之正寢壽五十有五娶張氏宣德望族貞靖柔懿自在父母家以稱純孝及歸於我事舅姑恭順飲食服御非經其手不進也終於至元廿三年十月廿日享年七十有五葬合祔子男三人廩字君美平江路匠人提舉至元三十一年十一月以疾歿得年五十有五配段氏享年四十有九鄣表部場管勾鄰才識警敏練達時務由省掾授承務郎工部主事次陞承直郎順德路

總管府判官選充監察御史女二長適渾源州王氏次
適應州元帥韓公之孫孫五紹祖江浙省宣使慶祖澗
山巡檢繼祖星通欽通從稷字賢卿終濟南路儒學教
授三子曰郇曰彬曰鄂彬承奉班祗候遂州酒監一子
從周字文卿尤氏先壠始葬順聖之耀武關南山翁徙
祖塋於渾源縣東北黃嵬鄉御史君以世故流離起先
塋於宛丘神川旅殯洹水歸愚定窆燕山令鄰奉大父
中奉公衣冠及考妣柩安厝於河南北印之原是為渾

源劉氏洛陽新阡鄰復欲彰先懿昭孝思圖不朽諗不
肖嘗問學於神川先生知其家世頗詳持張陳李趙雷
王諸公銘誌求述世德碑以猥列後進年迫衰謝不能
發越先賢事業且何敢秉筆於諸名勝之後堅辭者久
之鄰後曰金亡士之北渡者百不二三今消磨已盡求
接見先輩老於文辭而最知名者莫公若也今弗惠顧
則先世之事將於何托不獲已乃採掇諸公緒餘及已
之見聞而知者會歸其極而系之銘銘曰

漢庭射策貢士遺風排斥百氏仲舒是崇唐文三變敗
北無從振起衰薊尊昌黎公兩公傑出莫之比隆考其
肩裔孰繼芳蹤大名難再氣數竒窮金源立國網羅才
雄首魁多士惟南山翁程文妙絕一世師宗當時景仰
韓董攸同子孫克肖家學是攻魏科七決聲華摩空故
家文獻泱泱大風蓬門卓爾世業克充言直行果節効
匪躬支撐傾頽致時之雍賚志雖歿留名則鴻中奉矯
矯職貳大蓬存亡惟義表我孤忠子孫昌熾為報則豐

神川力學洞聖心胸明理貫適匪文奚工玉佩瓊琚大
振辭鋒道家學之淵流會百川而朝東章甫適越惜不
時逢陰相同氣先志恢洪朱衣白簡乘御史驄何劉氏
之多賢試紬繹其始終種德植善無踰於農立志務學
祿在其中忠義仁恕傳嗣彌縫維人事之克盡見天理
之昭融宜澤流渾水之源青蔚南山之峯北印之原歸
然新宮世故牽率匪志祖封是惟金百年文宗之裔過
者敬恭

大元故廣威將軍屯田萬戶聶公字正卿神道

碑銘

皇元以神道戡定區宇剪金取宋保塞一軍號稱雄勝
帥閫堂堂節制於上亦由部曲宣力得其人故也况聶
氏與蔡國張公奮跡布衣義同里閭依乘風雲奕世竭
節者哉公諱禎字正卿世為定興沈陶井里人曾祖洎
大父皆在野不仕父福堅資豪偉善騎射國初張公團
結鄉義柵西山之東流塢選推為百夫長從定河朔取

汴蔡有殊績終襄縣屯田總管母夫人段氏同里大家
生四子公其長也幼沉鷲寡笑言不作羣兒戲及長聰
敏好學有謀畧慷慨尚氣節年十七嗣襲父職張公察
其才武試以攻守之方為問條對洒洒有成美公愕然
不復以向之吳下阿蒙為昧歲丁未率本部分功立杞
城毫阬宋人出沒以絕侵軼之患繼攻泗州前後以功
受賞有差己未扈世宗皇帝渡江攻鄂渚拔螿弧先登
陷東南城堞都督戰親覩壯其勇酌酒飲賚以紀其功

其年冬命領千兵迎援大帥烏梁海岱於長沙水陸轉戰備嘗艱苦竟達漢陽由是陞總轄仍佩銀符中統三年賊壇叛公攝二夫長分圍厯城接戰嘗先諸道兵蒙賜鏐馬俾激士氣壇平遂南城荆山至元六年真授千戶易以金符是年朝廷進軍襄樊公屯守鹿門甚力至元七年行臺命公將番漢馬步三千人取新興塞公曰彼衆而恃險我客而力不一惟當神速掩其不備可成功爾遂一戰而克斬馘不勝計生擒者七十人賞楮幣

四千緡至元十二年分隸元帥字羅和收連海淮安等
州宋守將許安撫者陳艤艘五百艘以俟公帥麾下直
擣之許少却水陸乘之彼軍大壞殺死溺水者十七八
盡獲其戰艦器仗帥府上功旨陞武節將軍繼攻下昭
信泗州階進宣武時孽宋已亡江西湖廣皆內附獨靜
江恃其險遠旅拒上以亳軍素精銳戰必勝攻必取命
摘全軍進擊至貝賊勢披猖公率猛士深入殊死鬪首
奪西南城堞衆隨之以進城陷捷聞加授顯武將軍行

軍總管桂境雖平大兵後所在草寇竊發充斥山谷間
為良民梗衡山茶陵尤稱攘搶帥稔公威名烜赫摘諸
翼衛兵千人往平之公窮竟窟穴夷抉根株其脅從汙
染者諭歸田畝井邑安堵軍無私焉所在老幼擁馬首
泣拜曰非公活我吾四縣遺民二十餘萬無噍類矣其
戢禍亂威愛兼濟有古良將風既而蒙古漢軍都帥張
侯以公部曲故家屬立駿功請於朝復備將佐十七年
從張侯入覲進拜明威將軍扈軍副萬戶仍賜錦袍一

襲旌宿勞也俾鎮建康尋移維揚十九年選充江淮都
轉運使二十五年改任廣威將軍大都屯田萬戶一載
間區畫營屯耕稼有法比前政收穫為倍蓰二十六年
更授右翼萬戶田旌閃閃有萬屯曉唱之樂至元二十
六年三月十六日以疾卒於官享年六十有二塋祖塋
公資外嚴毅內廓如也孝於事親忠於為國出天秉固
然治軍旅號令嚴明部伍整肅臨陣抗敵挺身決戰略
無顧惜故每戰有功聲名烜赫暇則讀書不輟左氏傳

通鑑戰國策皆通大義古人良法美意竒計偉畫涉獵
蟲會多見諸行事方經略南服母夫人陳氏尚在堂公
迺心王事不遑暇然遺親之念未嘗置頃刻也一旦心
神內動泚流被面曰豈吾親有故動於彼而應於此耶
即請歸覲比至太夫人喪尚未斂公攀號屢絕痛其終
之不獲一見勉襄大事鄉里感嘆為平昔孝誠所致夫
人郭氏同縣南王里人溫純恭謹奉事老姑怡順進退
不敢自專年踰四十夫貴子長應對門內事尚以名稱

姑病早暮侍養不少懈倦湯劑必嘗而後進及亡朝夕
廬祭者三周歲宗黨號曰孝婦待妾媵有恩禮畧無嫉
妬子一十一人長曰惟義承父爵右翼屯田萬戶次日
惟謙峽州夷陵尹曰惟明閤門宣贊舍人曰惟孝惟爵
未仕皆郭出也餘幼未名女四人俱適望族元貞建號
之二載冬十一月惟義踵門來請曰自惟無所肖似尚
賴先世遺澤嗣守緒業朝夕惴惴愧無光揚惟是鑽石
紀銘表諸神門圖報萬一稔聞翰學先生學古詞達當

代將相家皆有煩於下執事倘得銘則為不朽矣中統
建元余應召中省獲識蔡國父子及提憲河朔郎山雞
水之間亦嘗巡歷載惟疇昔雜次其件右而繫之以辭
銘曰

大夫挺志無先外事况乎戰陳聖所慎誌不有諸內孰
形於外擴我秉彛克作其氣惟燕南陲聶宗所系奮從
雲雷以功名憲侯不封萬志焉罔遂報之後人福祿何
既桓桓廣威克昌再世曉暢戎機蔡國首器發縱指獸

俾展其翼橫戈長江斬鯉蒼海萬竈同心雅歌奏凱長
驅靜江指顧摧敗草砌蟲如肆為民害玉石既分善良
攸賴笳鼓歸來旌旆揚彩酬功進爵大蒙天賚高大門
闕鄉閭嘆嘅不知其中大本有在子曾有言質而不礙
篤孝惟移化而忠義公於臣子存沒無愧巨川騰波郎
峯聳翠片石干霄千古光配

大元奉聖州新建永昌觀碑銘

并序

奉聖本秦上谷郡地唐始立新州石晉割賂於遼更今

名亡金陞武定軍節度今雖為州當兩都往來之衝其地望尤重於昔雲山環抱川流交貫樹藝茂盛有中土清淑之美風俗雄邁樂施而好善蓋燕雲習尚氣義而然也據治城東南里許有道觀曰永昌其初祖寂然子張志玄隱微世居河東之孟門縣越自髫齡歆挹真風從平水景鍊師為全真學既長正一法錄亦稱精究貞祐南遷所在俶擾聞長春丘公應聘龍庭師喟然嘆曰天道在北吾將遠遊雲朔庶有遇合聿隆道紀至永興

之清樂鄉愛其山水幽勝遂結茆而居凝神坐忘志趣
叵測謁漿之家咸異之曰彼其中必有所得豈徒然哉
由是風動一方日奉香火羅拜菴前聞有請必恍然開
悟乃相與選勝得獨山中水頭地起建琳宇處師為上
賓榜曰迎仙尊顯之也師佩上清三洞靈章主盟武定
者幾廿載前後化度門人甚衆惟吳張盧三法師得其
要妙而吳在伯仲為最寂然謝世藏觀南化臺吳號通
玄子氣貌魁偉志行誠篤體含妙用動達玄機寂然師

知為受道器常勉之曰汝舉止異常言論卓犖通文辭
知醫藥恐鸞翔鶴翥終非草野間物寂然既終行緣城
市人或叅扣誦答如流有一鉢千家飯渾身百衲衣心
如江月朗情似野雲飛之句其胸懷洞徹如此加以符
水療疾隱痛隨愈衆驚異以有道目之達官豪右共來
敬禮至有得望其丰采而為幸者闔境尊信法緣契合
遂易亡金劉大監別墅為棲真所中有亭崇臺層檐為
一境偉觀即改亭為殿奉三清辟容下逮齋厨庫廩以

次修舉署曰永昌與迎仙為上下院自是徒衆雲集檀
越之家設醮筵而徼冥福求符藥而濟疾疢者憧憧而
來曾無虛日鐘磬之聲隱然聞於市肆間永昌琳觀為
一方名勝道俗歸依之所矣通玄仙去寧神於永昌之
南以後事付上足弟子虞法師師行業修潔和光同塵
心存濟度多蒙藥惠補治遺缺而觀之規為始克完具
以推擇充玄門道錄虞寂陪葬師側其徒崔志善踵而
增飾之崔沒盧法師以道錄來住持焉傳之門人李道

素道素姿樸實惟恐過逸前光內則起廢寮舍外則增
置田圃朝夕齋戒載勤頌禱望高羽流擢判管內道門
事廼惴惴不遑曰向上師真剴心勞神披荆榛掇瓦礫
鋪敦教基吾輩何有坐享其安惟是刻石紀行俾見興
建本末庶垂不朽來丐銘予以道不同不相為謀牢讓
者再請益堅乃酌取大方家見於吾儒之紀載者論次
而銘之後世所謂道家者流蓋古隱逸清潔之士矣巖
居而澗飲草衣而木食節欲以清心修己而應物不為

軒裳所羈不為榮利所怵自放於方之外其高情遠韻
凌烟霞而薄雲月誠有不可企及者自漢以降處士素
隱方士誕誇飛昇煉化之術祭醮禳禁之科皆屬之道
家稽之於古事亦多矣狗末以遺其本凌遲至於宣和
極矣弊極則變於是全真之教興焉淵靜以簡寂釋心
而儒行翕然從之實繁有徒其特達者各相迪躡自名
其家若寂然師弟弘衍博濟教行山北是闕也耕田鑿
井自食其力垂慈接物以期善俗不知誕幻之說為何

事敦純樸素有古逸民之遺風焉而復畀授得人顯揚
斯在是可書定安之白雲觀盧法師建永興之觀張法
師建與永昌同一法眷也銘曰

道之大源玄文五千慈儉不爭清靜自然辭固奮激至
理無邊修道為教由是之焉全真為學本乎善淵返純
還樸復太古天究其源委豈忘蹄筌寂然出世私淑其
傳雲朔俗勁聞善易遷坐忘感化孰分後先傾心信嚮
克興大緣絕塵而下復得通玄化行城府重闡法筵一

時景仰道履翩翩香火奔走先業昭宣燕處有室耕鑿
有田遺我後人基緒綿綿門人繼承持守拳拳光揚有
例刻銘瑤鐫流光遺烈斯萬斯年

大元故正議大夫浙西道宣慰使行工部尚書

孫公神道碑銘

并序

雲西風土雄碩龍山峻極為之奠焉渾流交貫神川清
淑資其潤焉故士生其間有瓌竒宏傑之稱而劉雷為
之冠焉然山川炳靈奚間今昔况河洛為帝王之里并

汾多攀附之臣儷景風雲依光日月者哉若乃始以才

技有光世緒終則挺輸忠蓋作時名卿安榮福壽慶流

後裔者誰乎故宣慰使工部尚書孫公其人也公諱公

亮字繼明世家渾源橫山里曾祖諱伯大父諱慶文咸

勤力務本不耀其光顯禰諱威為人跣跣不羈早以功

名自憙少有巧思肆函人業繕治堅密出新意於法度

之中方太祖皇帝聖武經畧中夏總攬豪傑貯除戎具

為急廼挾所業投獻上賞其能應時需賜名伊克烏蘭

錫佩金符充諸路甲匠總管太宗朝從征秦晉惻民被
屠戮屢以蒐簡工匠為言賴全活者衆顯妣杜氏主內
務有綱紀嘗辯雪工徒貿逆之誣因之脫死公生漠北
年十許歲總匠君挈之入覲太宗異其氣骨曰此兒他
日必大享用蒙賜御饌自是得出入禁闥矣及長資英
明多藝能慷慨有大志練習國典通曉譯語所交皆一
時豪傑衆亦以通材許之庚子歲襲父職佩銀符定宗
朝換金符歲進課精例賜錦幣憲宗特賚貂裘仍勅繼

稱父賜名世祖皇帝在潜邸上命歲輸百鎰有中七矢而不貫者其堅完如此及南征果獲用中統建元授都總管上北征駐庫摩端公出私財置甲冑六十襲以獻天顏喜甚錫銀笏

命領

諸路雜色一

闕

四十妻工之鰥者歲支衣糧

贍濟不給

闕

局廩給自此始又考制度定程式作諸路

恒法公自承嗣選材

闕

下招亡恤弱出私財以代公費

闕

獲而

闕

軍興

闕

蒙賞進秩可謂盡心所事克

闕

以人材抱負論之於將補闕寶鼎枝車未膺所用

有鬱鬱不能自己者至元改元朝廷清明治具畢張公
上疏抗言宜設御史臺肅正紀綱雖不能有符士論偉
之五年憲府肇建特拜監察御史官忠翊校尉上諭大
夫塔察公曰他人則未之識如伊克烏蘭朕熟其忠廉
宜與汝共事時官僚極一時之選較夫多識朝廷故事
洞達諸色情狀材氣足以投赴事機威望可以懾服豪
猾在公無以踰此一日職與志恆思明目張膽鯁言無

忌仰答恩遇闕是風生白筆氣凌霜簡論列無虛日時

宿衛鷹房闕待城社頗縱恣在他人弗措手者公優為

之如上闕時門強奪民物東安州縱馬馳嚙食桑棗

昔至砍伐為薪公痛繩之以法至闕強畏避上聞而以

闕目之闕年考滿憲長奏公自供職無點水私至絕闕

飲風稜銛利刺督切中裏行無出其右闕

時選擢正為此爾可再任俾矜式新進者既而察闕為

外事闕還西川行者冒支楮幣二萬餘定闕

之義為

闕 役

士治第採薪至被虎

闕

五十仍奏治其罪十年夏宣授金符武

德將軍簽山東東西道提刑按察司事至則務實用顯
效張皇憲度故材庶者必薦姦貪者必置於法州郡惴
惴奉約束惟謹寨帷具瞻有風動百城之目東平路監
尹出貴戚簡重自居監司官至郡未嘗相覲聞公來按
部迎謁境上糾治豪縱不法者十數輩曾無一語護援
及去復伸餞禮博德高唐耆老炷香於頂來迓曰自立

憲司未覩稱職如公者我輩獲安田里受賜多矣其威望顯著吏民畏服可知已十二年陞山北遼東道提刑按察副使遼東境土曠遠諸王營帳泊諸部種人雜處其間恃勢相凌為申嚴法禁革去宿弊豪強斂迹小民氣得少伸分司遼陽親王近侍五人劫居民資用且毆擊之有司不敢究民來訴即械五人狗道衢王諭釋其罪竟杖決之灤水濶而雜砂石自昔無津梁命造荆絡貯碎石為柱以成橋倣此建者百所自爾遼右免病涉

之苦十三年進階朝例十四年春陞授中順大夫彰德
路總管分佩金虎符惟相當南北衝會民物繁夥自昔
為河朔名郡然政務煩重視鄰路為倍蓰公諳練政體
材地有餘當王事彙集訟牒交至泛應曲當不失時措
之宜平生遇事有為一旦重膺民社廼究竟利病俾實
惠及民以三事躬請於朝其一比歲霖潦傷稼民多闕
食准免逋稅九千七百石其二諸郡輸逋取道本路徵
發車牛越廣平抵順德往還餘五百里非惟偏倍恐民

力不堪蒙以廣平之磁州代焉其三本路稅粟歲輸大名秦家渡由唐宋渡河東南行百五十里歲晏寒沍車人告病聽於唐宋倉輸納前政貸民資五百餘定起新附軍營舍至是亦給公帑邢氏李閏六嘗殺人累問弗伏干證餘百人移公推密廉其實遂伏辜餘得釋時以神明稱終更相人懷思至琢石頌焉江浙平上諭中書省造作事重當選能者主之十六年冬授正議大夫浙西道宣慰使兼行工部事籍人匠四十二萬立局院七

十餘所每歲定造幣縞弓矢甲冑等物十八年上命左丞相阿老罕等征日本給辦艤艫戰具繕製堅完都將以聞上曰伊克烏蘭豈有誤耶二十年十月來朝大為上所獎諭賜宴於便殿二十二年授江西等處行工部尚書上章致仕間居清苑每風憲洎臨民官來質疑必告以益國便民之方二十四年九月覲上於朝殿上念世臣之舊問年今幾何居某處子孫幾人奏對畢賜食俾坐於御榻之西上遣大府卿鴈喇固問曰飲飫飽未

復賜鹿羹白酒沾醉而出大德元年子拱總尹大同奉公與夫人張氏還鄉里時公及夫人壽俱高日與親友相飲宴鄉人榮之改渾源西北山曰畫錦有司亦用名鄉四年正月廿九日以疾薨於私居之正寢享年九十有九遺訓子孫勉力忠孝少不及私二月十四日歸葬於渾源州西劉村先塋之次送葬者數千人哭聲聞數里外蓋平生感懷於人者如此夫人張氏梁氏皆出名家張氏終於四年秋壽八十有四梁氏先公没子三人

拱資誠實材果純孝力學由工部侍郎陞授少中大夫
大同路總管兼府尹本路諸軍鄂囉總管管內勸農事
撤武畧將軍武備寺丞振忠翊校尉定海縣尹女三長
適安平縣尹趙襄次適李氏劉氏孫男四謙襲世職從
侍郎保定等路軍器人匠提舉次早世諸承直郎利器
庫提點誼進義副尉保定等路軍器人匠提舉孫女三
適趙氏王氏次幼曾孫男一努克特曾孫女三長適李氏
餘幼公儀觀魁偉器量豐閎美鬚髯容色莊厲嫻習時

體諱語瀾翻雜以談諶顧國族貴卿無以易其論列公
朝集議寮屬處正奉公詞情剴切毫髮不假借善為鈎
距能得小人根株窟穴似夫古之能吏才大夫至於奉
上忠事親孝交友誠雖位望顯赫循循謙讓退然如無
能為者齊家教子敦篤義方循尚禮法又似夫齊魯敦
行之士生平疾惡由義激忠其心休休樂善成美出於
天稟粹厚放良臧獲百餘人貸貧民子錢七萬緡宜其
三任風憲位正總尹丕張世守官筮六卿剛直有守允

協士論忠勤無間簡在帝心福壽綿延子孫衆多家門
隆盛雖曰依乘亦由平昔操履感召有致然也可謂
材德具備勲名兩全哀榮終始者矣嗣子拱以墓碑來
請因憶至元戊辰憲臺初立公與不肖同擢御史引見
世祖皇帝在廣寒殿自爾議事松廳聯鑣驄馬義氣交
孚相得為甚懽後偕官於相迨歲壬辰應聘北上復私
覲保塞追叙契闊當時並峨豸冠今所存者獨吾二人
公又奪去僕雖老忍無一言耶既叙梗槩仍系之銘銘

曰

雲龍奮飛西北天神武載造坤與乾有來羣后旋戎軒
所在戈甲相周旋孫侯挾技善達權賜名訓徒畀任專
函惟杆格貴弗穿函雖多樣公發源犀兕七屬光生烟
上為嗟惜賞世延風雲儷景同翩翩執藝諫請多活全
臧孫有後理固然公其挺生鍾世賢嗣興遺緒心彌丹
鯤化躍出天池淵豹冠執法班朝端憲綱未舉為進言
太微一夕光星躔朱衣白簡相後先忠臣憤激同鷹鷄

秋風搏擊無空拳上目剛直由孤騫青齊遠碣海岱連
地廣物衆牙孽間綉衣風采何翩翩積弊一鏟摧邪姦
恥令張趙出吾前煌煌金節臨漳垣霜空霽嚴正春妍
侯伯正位務固繁刺裁錯節驚龍泉吏惟寬慢猛則殘
要本實惠蘇民編上請三事民力殫轉輸省便逋賦蠲
橫斂追給公府錢去思有頌德化宣江浙平一俗巧僂
訓授程課需世官共工汝賢常伯聯工局染院勞次銓
歲時供億物利堅聖皇眷顧稱忠惓一朝上章遽引年

功成身退名節完嗣侯亞卿請外遷作牧鄉郡意所便
錦衣榮養白晝鮮世期福壽方綿綿丘山零落館舍捐
停雲苒苒橫之巔時有白鹿馴其阡神遊悽斷招來篇
自昔豪傑誇雲燕乘時樹立孰敢肩千年鄴劔埋神川
鬱鬱紫氣衝斗邊何以驗之瑤有鐫英聲並與斯銘傳


秋澗集卷五十八

謹按卷五十七第四頁後五行鳴瑪拉舊作紺麻喇今改
十一頁前七行濟遜舊作只孫今改 十六頁後四
行布哈舊作不花今改

卷五十八第七頁後三行星通舊作勝童又欽通舊作乞
童今並改 十頁後一行烏梁海岱舊作兀良合歹今
改 十一頁前一行羅和舊作魯歡今改 十八頁後
八行伊克烏蘭舊作也可兀蘭今改 十九頁後三行
庫摩端舊作苦沒敦今改 二十三頁前二行阿先罕

舊作阿利罕今改 前八行魯喇固舊作納里忽今改
二十四頁前七行努克特舊作獾頭今改





總校官進士臣胡榮

校對官學正臣卜維吉

謄錄貢生臣繆濂

欽定四庫全書薈要

集部

秋澗集卷

五十九

六十



詳校官助教臣謝登雋

欽定四庫全書薈要卷一萬六千二百十五

集部

秋澗集卷五十九

元 王惲 撰

碑

大元國衛輝路創建三皇廟碑銘

伏羲神農黃帝
舊為醫家

所
奉

衛之廟祀三皇權輿於國初醫家者流因城隍祠右故壇屋而像之庸申歲時瞻仰之懇然位置迫隘規制卑陋不足以安靈竭虔為神明觀府監尹達實特穆爾顧

其如是蹶然於中私自念言當尊而侈大之心有所在而時則未遑也伏承登極詔條聖帝明王守吏致祭廟宇傾圮官為修葺至大德庚子歲夏仲祠部頒降三皇禮秩以春秋二時享獻蓋宗本醫學拯恤元元也而昔構不稱安能儼肅禮容光昭祀典哉侯乃咨謀于僚屬曰明詔所當寅奉民力不可妨奪工匠不可徒役公帑不敢擅發也當首出俸稍以為倡率少尹博索瑪因判寮高興仁推官馮琚相與贊襄下逮屬吏醫師筮士從

風皆靡聿來胥宇於是相治城北郭汲署故址爽朗方
桁奠敞神居經始於是歲冬孟斷于於明年季夏為禮
殿三巨棟松栢旅楹奕奕挺鳥望雲就日儼若帝者之
所其臺門洎醫學講堂齋室以次修舉其秋因常裡禮
奉安神棲儀物肅備薦獻通暢士民來觀歛忻贊嘆謀
斷石紀蹟傳示方來持學正祈伯易事狀以建修碑銘
為請不肖念鄉榆盛事其敢以衰耄辭夫德高太上者
宜垂不朽之名澤及萬世者當享天下之祀鴻荒肇判

為生民害者多矣三聖繼作觀象化民創物垂範如畫八卦以通天地之情造書契以代結繩之政耒耜以資耕耨舟楫以濟不通衣裳宮室既厚其生棺槨歛葬復恤其死交貨賄而易有無剗弧矢以威強暴然後民得安居以粒食優游以卒歲孔子繫易聚太皞神農軒轅氏功德如此其見於醫家說者謂神農氏一日嚼嚙物毒七十餘種軒岐論難本乎大道而究乎死生之奧故近代猥為主祀若以三聖人開天建極利生民而仁後

世者論之特一事爾在汴流求源雖出於人心之至情而報本反始乃有國之令典按歷代祀秩曰皇曰帝惟唐嘗置廟京師餘雖舉祭定於故都三年一祭而已我國家掃欃槍以清華夏斷鰲足以立四極還淳返樸崇德尚功三年故都之祀亦嘗舉行迨聖天子當宁道媿生成仁含動植祗嚴寔祠克作神主開建醫學德洽好生故有司推廣睿意俾同通祀致祠廟徧于天下其敬恭之典越至矣乎伊守土臣奉承唯謹規為有方不傷

財不役民未及閔歲而起百年偉觀事神治人可謂能
也已 是宜銘銘曰

林林總總厥初民生理具畫一七鑿方萌乾端坤倪軒
豁露呈孰措其一底於和平聰明惟直體用含弘三聖
繼作見天地情裁成功化以逸以寧濟民仁壽萬世稱
仁德至孰邁道大難名功同元化罔知中行推原報本
任理攸應大德之政思治幽明在在通祀尊隆莫京惟
守土吏恪於奉承載敬新廟閔安神靈聖靈在天與時

降升雲行雨施品物咸亨云何事神而瘠於氓翼翼禮
殿有儼神庭民初不預吏亟經營維皇降止庶監嚴誠
風雨時若歲事屢登民浸福澤豈曰吏能謹夫歲月爰
勒斯銘事神治人績用昭稱煌煌麗石永垂頌聲

表碣

碑陰先友記

曹居一字通甫北燕人有文章善談議以謨畫佐征南
幕府官員外郎卒

劉祁字京叔渾源人資純粹早以文章擅名有神川遊
士集行於世弟郁以篆隸真行名家終監察御史

牛天祥字國瑞上黨人深天文武經學歷恒山公府講
議官應東諸侯聘客死聊城

孟道字伯達瑯邪人性沉毅有機果威儀抑抑以學業
顯東海

趙澄字公靖共城人性純古有儒行終衛州教授

司之才字進道淇門人業詞科有聲場屋間性峭直有

口

盧武賢字叔賢燕人資雄俊熹談兵以客卿游諸侯間
王之綱字德柔湯陰人通世務以儒術緣吏事有鹽鐵
諸論傳於相下

邢敏字公達秦人性公直明法令以廉自持用薦授左
司員外郎終大名府判官

李貞字彥祥黎陽人先考同年吏員轉尚書戶部掾性
溫粹以善淑稱

釋朗秀廩延人行精嚴內典外五經子史無不究覽逮
耄期不倦示滅衛之仁化寺

楊果字正卿蒲陰人詞賦第歷劇縣俱有能聲文采風
流照映一世拜參知政事終懷孟路總管

董瀛字巨源廉臺人精力有幹局常從王濬南問學今
為淮東按察使

董民譽字端卿陽夏人詞賦第為人渾厚無圭角與時
浮沈常參預江漢都督府事

劉方字元卿陵川人性清古善歌詩終衛輝路提學

宰沂字魯伯洛陽人才長氣豪抱負竒節嘗與中書楊
維說降山西主帥時人壯之後為王府徵士

張豸字義大相人性僻直數從事郡府少不合輒望望
棄去

趙鵬字搏霄蒲陰人純粹有耆舊風金詞賦進士用辟
舉令泌陽以廉能稱

石蓋德玉字君寶蓋州人性至孝與人交剴悌篤信義

嘗與友共事惡其不直遂絕而不較

勾龍瀛字英孺河南人性方直在河南有詩聲述姓譜
行於世

烏方論貞字正卿遼東人沈毅果敢用蔭任內侍官得
幸北渡後顯仕於去就不屑

周惠字德甫隰州人性慷慨有大志早貴幸樂與賢士
夫遊終江淮都轉運使

王昌齡字顯之滄州人蘊藉有經濟才由參議史忠武

府知衛州有惠政

李瑞字天祥汲人性強果重義急難凜古人風達吏務有謹議於先考執弟子禮終身焉仕至潞州判官

王贊字子襄登封人性直諒生平游元劉間好詩學

劉冲字進之太原人性剛克敦友義嗜學安貧樂道人善事與心會激節感慨有幽并豪傑氣尤長於左氏春秋

馬寅字致遠許州人性雅重嗜古學恬於仕進

丁居實字仲華錦州人用蔭以吏起身有廉德北渡後以前代掌故授禮部郎中致仕

馬佐字佐之滄州人金明昌太學生有賦聲

完顏孟陽字和之遼東人用門資起身為部掾北渡後不仕好古書家藏至千餘卷

沈侃字和卿魏人資端方精律學嚴而疾惡由憲臺司法調陵州倅致仕

張善淵字機道譙人少為黃冠師性機敏有幹局表表

為玄門綱

王磐字文炳永年人經義第一人品高邁儀範一世文章精極理要臨大節不可奪今為翰林學士承旨

徒克坦公履字雲甫遼海人經義第學問該貫善持論世以通儒歸之性純孝樂誨人官至侍講學士

陶諒字信之獲呂人有吏幹歷邑長著能稱

程和字仲美武涉人長管庫材以聚書教子為志竟莫遂而沒哀哉

胡璉字國瑞武安人詞賦第為人慈祥樂易風流偉德
度子祇適有俊材光大其先業

朱萬齡字壽之雲夢人生平以道學自負星歷占筮乃
其所長

楊弘道字叔能淄川人氣高古不事舉業磊落有大志
文章極自得之趣有小亨集行於世

王信字信之南燕人少為律吏美丰儀嗜酒有氣義
李班字晉伯北燕人性介特以品官子補部掾

趙非熊字周卿安陽人貞祐間嘗以材武選為春官衛
率為人資嚴厚可任以大事

長樂阡表

汲郡王氏其先河南陽武縣園亭人避靖康之難北渡
河至汲樂其風土衍沃遂占籍為長樂鄉西晉里人今
墟落南原累累而阜者蓋自肇遷以來丘隴也族衍代
深法不可溝合率藁殞兆外時我曾祖府君以大宗子
覩其然而歎曰禮當改卜新阡為王氏第二塋明靈其

舍諸況責實在我乎於是擇葬而東得地於第四疇清
溝之北自禰而上三世合羣從凡厝者廿餘窆其紹已
絕而力弗逮者率棺衾畢具遠近聚觀莫不欽其孝之
至仁之厚也及夫歲時墓祭先西後東傳於今而不墜
百年來墓栢蔚茂蒼烟梨雪光動林陌識者謂君子之
澤淵流而未央也時則太和之末大安初年也迨我有
元至元十五年戊寅不肖孫惲由翰林待制授朝列大
夫充河北河南道提刑按察副使明年春三月按部而

南過家上塚首從二墳以封以饗其東阡則繚以短垣
周若干步武復欲發達幽光慨焉莫究訪耆舊則高年
俱盡考世德則旌紀寂寥因念天下之物未有無本而
立捨祖而豐昵者也然遠則疎疏則不親不親則塗人
此世俗之常情也今王氏二百載間丘墓移置者三始
焉西晉里再卜白楊曠分白楊而祖西河鄉勢固有當
然者彼子孫浸遠吾豈敢必其不源委泮渙枝葉扶疏
者哉惟其泝流尋源推末求本明夫當然之理因得不

親其親而豐於昵者矣後之來者能以吾言世守而不
易雖百世可親也而我祖建遷之義是不可不表見於
後曾祖諱經字伯常讀書不仕以仁厚庇一鄉衛人至
今以長者稱銘曰

族萃蕃理則遷尊而祖獲所安論本根不易存祭先河
祖所遵致時祀首遠墳取此法裕後昆繫我曾實古人
仁之厚孝之純西晉里長樂原憶墓栢鎖蒼烟鬱相望
見嬋媯孰不曰王氏阡銘貞石表先德陵谷遷庶可識

管勾推公墓碣銘

公諱德字濟之姓推氏其先相州隆慮人宋季有起身
刀筆至州錄事參軍者以政尚嚴明不畏強禦名大父
暨兄金初避仇徙家衛之共城伯祖以材補縣吏不幸
皆早世考復字永亨時在襁褓母李氏貧不能家提之
再醮邑醫杜氏及長就傳其術遂以良醫稱公少穎異
能紹其家學軒岐雷扁以來書浩博不易究悉研窮機
要所得為甚多正大丁亥以方瘍兩科中選由醫工補

省司管勾公有蘊藉以德藝為上官推重生平志存濟物故其詮次疾症未嘗以貧富易心理或未安歸若芒刺在背隱不敢着席初貞祐大兵後比屋疫作與考謀曰今用厄如是我實司命可坐視不救遂大措湯劑歷飲閭里問其乏粥濡者復以米遺之全活甚衆天興初盜起西山約衆東走汴中塗遇劫賊熟視為公遽放伏前謝曰推君父子擲以藥惠脫我輩命忍以非義加諸餘亦獲免壬辰秋歸隱蘇嶺老者尊其德病者賴以安

而少者訪其學然神膏傳瘍靈丸起癢醫家者流正
有定法而僻隱贅異等疾在方伎所無者公率能一望
而知意料而決翕忽死生之變如程氏子得腹痛疾以
食毒治而苦愈亟謁公狀聞曰此臍疽也已無及矣程
公曰後三日當有腐血下而絕及期果然晚節耽翫史
籍酣適醪醴浮沈得喪一寓情杯酌間或勸焉曰吾方
陶然遊太和之鄉君可去毋啜竟以飲致疾終享年七
十有二配桑氏鄉進士彥周之女壺儀母道有承平故

家風範生女子三人長適司侯張顯仲女鉅家李氏季歸王某後公五年卒壽八秩聳顯等合葬古郭里柩門

山南原殿士桑君瑩西南隅實至元二年二月四日也後十五年春憚按部南下躬奠墓次泣然興感縱羊曇之淚下沾襟時思罔替終伯道之自遺伊戚為恨何如惟是鑽石紀銘昭告下泉庶幾少有慰焉推為氏歷考姓書不見惟潛夫論載餘推氏出楚之芊姓公豈其苗裔乎銘曰

軒岐有書是為內經洞達病機惟明克能於惟我公天稟粹靈靈九起廢神膏續肱不主故常以意智行推本所自其源淵渟藝精多挾度貸可居高下其手類夫吏胥繫公處心德度愉愉拯溺救焚已焉是圖相彼陽施宜嗣厥後本支顛兀理莫可究纍纍堂封栢山南元刻銘表公以慰下泉雖高深兮易位尚知為鄉先生推氏之阡

故將仕郎潞州襄垣縣尹李公墓碣銘

世有風誼之士粹出天稟不俟激昂藹鄉曲之譽稱於
士大夫間者李公其人也公諱瑞字天祥其先潞州上
黨人系出唐昭武公抱玉之裔五代季遠祖以官家衛
公為人慷慨有機警長身銳目髯模糊蝟磔酒酣吐氣
抵掌談話而英姿颯爽之餘猶隱然溢眉睫間少為縣
吏錄錄無所見正大間恒山公僊提孤軍宿汲連九公
聲援君時給事幕府參軍李公愛其武幹委以赤白囊
事公感其知遇晝則荷戈捍侮於外夕則抱牘上軍務

於府殊赳赳然及宜津撤守跳大梁既而京城疫作縱
飢民出公倡率流播救死扶羸歸郡延薩竒蘓悉編為
氓者千七百餘口逮乙未春家府一見喜曰此跡弛士
也教之當有用遂確磨礪厲日致其詳謹焉州召為吏
主椽數不屑去壬子秋詔以衛六縣為丞相忠武公采
地參卿王公來主州治舉其理劇署之典簿領聽其指
縱躍如也巨細之務釐補肅叙効其用居多俄薦授錄
事參軍兼汲邑長將順拊循至有惠愛至元三年總尹

陳公以材辟府從事六年積前後勞赤牒授潞州判官
棲遲下位德及民為艱故寬簡持大體謙讓睦僚友聽
共佐理中多裨益了不露已出至上敬下安惟恐秩竟
而去之遽也九年夏予調官晉府過家上冢昨飲水濱
話平生甚悉翼日雞一鳴送予遠郊外泣且言曰吾老
矣不能為升斗祿走形勢途第相見期邈未知復無恙
否遂哽噎訣去余亦欷歔久之且訝其遽如許也其秋
以訃來告嗚呼哀哉公事家府執弟子禮三十年始終

如一日一別終天葬弗逮送弔不及哀銘誄未彰有恨
何如嗣子震既礪石墓道百拜來請銘曰無庸固所願
也公姿孝悌喜賓客賑貧繼乏雖脫驂指困略無難色
至於排難解紛不自顧惜焚溺之在已復能通下情知
疾苦媁媁款款老安少懷與人接無貴賤禮夷故牛童
馬走盡得其歡心又備嘗世故小心儉畏以省事為樂
有訟來質成公溫言理喻曰緩急人時有也其忍以小
忿興怨可退思自省既而偕謝曰公長者過不敢復聞

又善營構事不為巧飾要以敦鞏延百載下如衛之泮
宮潞之儲廩是也初農民發野塚市甓下令禁焉暴委
之患遂絕士人牛國瑞聞公義託妻子東遊客死聊城
為經紀其家又石其氏者坐事累倅不易辨明索之甚
急投公匿焉竟賴以脫里有喪率匍匐救視孔懷之情
踰於兄弟至貧不能舉者棺衾坎塋楸柎之物必具葬
乃已其周急趨難甚於已私類若此終飲德不伐間居
灌鑿樹藝麓衣糲食與老農老圃為伍殆將終身焉噫

哀俗頽波中矯矯然有古義士風出則智効於官處則
行化一鄉可謂不凡者矣士方以壽祉期公一旦暴債
不及中壽為感豈氣盛亟哀物剛易折推原本自理或
亶然然觀義之所在有不亡者存焉異時有帶劔喬林
讀予文而興起者未必不拜酌公墳俾配食於縣社也
公仕至將仕郎潞州襄垣縣尹命已下卒春秋六十有
四實九年壬申七月十九日也配張氏先卒女二人長
曰阿醜女甥魏珍次未笄皆繼公沒嗣子震實主其喪

葬汲縣南唐津里清水之南源銘曰

太史著書游俠與侷不軌正理匪暴豪邪行而宜之義
莫有加李公之先奮跡將家餘烈有光流而義華故俠
焉負巨先之氣行焉佩仲由之殺家府與訓化而柔嘉
據理施惠如有等差趨人之難甚於己私孤不自存我
衣食之貧不舉喪我棺窆之野塚纍纍公助半之夷考
其行匪義則那以之莅官敏而外和絲棼我理瘡痍我
摩方百里之命下俄春者之不歌心則罔單其如命何

念公平生涕泗滂沱番番良聲公榮實多泉流西東太
行嵯峨我銘刻石等於不磨

秋澗集卷五十九